

www.BibleForChildren.org

मत्ती 26



फ़सह तिहारे करां
शा दिहाड़े पेइले यीशु
बैतनिय्याह ड़लव्वें मांजो
चलो अव, ज़ैडी लाज़र रातो
थियो, ज़ै यीशुए मुड़दन मरां
ज़ींतो कियोरो थियो। तैखन
मरियमा जटामासी सेइं बनोरो अध्धो
लीटर खुशबूदार इत्र ज़ै बड़ो कीमती थियो,
यीशुएरे पावन मल्लो, ते अपने दोग्गेरे बालन
सेइं पोंछने लगी, ते सारू घर रोड़ी मुशकी सेइं भेरोई जेव।




तैल्ला पत्ती, यहूदा इस्करियोती, जै 12 चेलन मरां अक थियो, प्रधान याजकन कां जेव कि तै यीशु ट्लुवानेरे लेइ तैन केरि महत केरे। एन शुन्तां तैना बडे खुश भोए, ते तैसेरे महतरे लेइ तैनेई चेंदेरे रुपेइये देनेरो वादो कियो। एल्हेरेलेइ, तै ठीक मौके बलगने लगो कि यीशु केन्चरां सेइं ट्लुवाए।



बस्सा ज़ेरो यीशुए अपने चेलन हुक्म दित्तोरो
थियो, तैनेई तेन्चरे फ़सह तिहारेरी रोटी
तियार की। खांते बार यीशुए रोटी ट्लाती, ते
बरकत मेगतां ट्लोड़ी, ते चेलन कां देइतां ज़ोवं
यांथ खाथ ई मेरी जाने। फिरी यीशुए दाछरे
रसेरो कटोरो ट्लातो, ते परमेशेरू शुक्र केरतां
चेलन कां दित्तो ते ज़ोवं, “यांथ तुस सब इस मरां
पीया। किजोकि ई मेरे नंवे करारे मां मेरो तै
खूने ज़ै बड़ां केरे पापां केरि मैफारे
लेइ दित्तो गाते।”



“शमौन, शमौन, खबरदार रा, शैताने परमेशरे करां अज़ाज़त मग्गोरीए
कि तुसन सेबभन परखे, कि रोड़े बुरे करां अलग केरे ज़ेन्चरे ज़मीनदार
गेहुंन करां झाझ अलग केरते। पन मीं तेरे लेइ प्रार्थना की, कि तू मीं पुड़
विश्वास केरनो न शारस, ज़ैखन तू मन फिरास त अपने विश्वासी ह्लान
मज़बूत केरां।” पतरसे यीशु सेइं ज़ोवं, “हे परमेशर तीं सेइं अवं कैद
भोने बल्के मरनेरे लेइ भी तियार आईं।” पन यीशुए ज़ोवं, “हे पतरस
अवं तीं सेइं ज़ोताईं कि अज़
कुकड़े बांग देने करां पेइले
तू मेरो ट्लाई बार
इन्कार केरेलो कि
अवं एस न ज़ैनी।”



तैखन यीशु अपने चेलन सेइं साथी
एक्की ठैरी पुजो, जैस ठारारू नवं
गतसमनी थियूं, ते तै अपने चेलन
सेइं ज़ोने लगो, तुस इडी
बिश्शा, ते तांतगर अवं उडी
अगर गेइतां प्रार्थना केरताई।
ते तैनी प्रार्थनाई मां एन ज़ोवं,
“बैपू! हे मेरे बाजी, तुसन केरां
सब किछ भोइ सकते। एस दुखवेरो
कटोरो मीं केरां दूर केरा। फिरी भी
ज़ैन अवं चाताई तैन नई, पन ज़ैन
तुस चातथ तैन्ने भोए।”




तैखन यहूदे, रोमी सिपाही ते किछ प्रधान याजक ते फरीसी केरे तरफां
भेजोरे लोकन सेइं साथी एन्तां दीये ते मिसालां ते हथियार घिन्तां तैडी
पुजाए। ते तैन मरां एक्के महायाजकेरे नौकरे पुड तलवारां
चलाई ते तैसेरो तैनी कन्न उडावा। पन यीशुए जुवाब
दित्तो, “बस्सा बडू भोइ जेवां।” ते यीशुए तैसेरो
कन्न तैखने हथ लेइतां बझावा।



जैखन तैनेई यीशु ट्लातो तैस तैट्टां नेइतां महायाजकेरे घरे नीयो,
पतरस भी पत्तपति बल्ले-बल्ले तैरां जेव। तैनेई अंगने मां अग बालोरी
थी ते सब बिश्तां अग तपने
लोरे थिये ते पतरस
भी तैन मां थियो।






महायाजकेरे नौकरन मरां अक
जै तैसेरो रिशतेदार थियो, जेसेरो
कन्न पतरसे तलवारी सेइं कटोरो थियो,
जोने लगो, “कुन मीं तू बागी मां यीशु
साथी नईं लाहोरो?” पतरसे फिरी इन्कार
कियो, ते तैखन कुकड़े भी बांग दित्ती।ते
पतरस बेइर गेइतां ज़ोरे-ज़ोरे लेरां देने लगो।



तैखन तैना सब तैट्टां उठे ते यीशुए पिलातुसे कां
घिन्तां जे। तैखन पिलातुसे यीशुए पुच्छ, “तू
यहूदी केरो राज़ोस?” यीशु तैस जुवाब दित्तो,
“तू एप्पू ज़ोतस!” पिलातुसे यीशु हथरां छडनेरे
इरादे सेइं लोकन दुबारू पुच्छ। पन तैना लोक
मना चिन्डां लगे मारने,
“कि तू एस क्रूसे पुड़ चाढ
एस क्रूस पुड़ चाढ।”




एसेरां बाद पिलातुसे यीशु तैन केरे हवाले
कियो, ताके तैना तैस क्रूसे पुड
चाढन। यीशु अपनू क्रूस छुइतां खोपड़ी जो
चलो जैस जो इब्रानी मां गुलगुता ज़ोतन।



तैड़ी तैनेई यीशु ते तैस सेइं साथी दूई डैकू
भी क्रूसे पुड़ चाढो, अक तैसेरे देइने पासे
होरो बांए पासे ते यीशु मझाटे।



दिहाडो भी कालो भोव ते मन्दरेरो पडदो बां देंता बुन तगर फेटतां दूई
टुकडे भोइ जे। यीशुए बडे ज़ोरे सेइं ज़ोवं, “हे बाजी अवं अपनि आत्मा
तेरे हथ्थे मां सोंफताई,” ते एन ज़ोइतां यीशुए प्राण दित्ते।



अरिमतियाह नगरेरो रानेबालो यूसुफ नंव्वेरो
मैन्हु तैडी अव, जै यहूदी लोकां केरे बड्डे
आदालतेरे खास मैनन् मरां अक थियो।
तै एप्पू भी परमेशेरेरे राज्जे बलगने
लोरो थियो। तै मैन्हु हिम्मत
केरतां गवर्नर पिलातुसे कां
जेव ते यीशुएरी लाश
मग्गी, ताके तै तैस
दबनेरे लेइ ने।

तैखन यूसुफे अक कीमती
लिगड्ड घिन्नू ते यीशुएरी
लाश कूसे पुड्डेरां ओसैलतां
यहूदी लोकां केरि रसमेरे
मुताबिक तैस लिगड्डे मां पलेटतां
एक्की कब्री मां छेड्डी, जै पहैडी पुड्डे
एक्की घोडे मां घडोरी थी। त तैस
कब्रेरे बेइर दारे पुड्डे अक बड्डे
घोड्डे घिसेइतां छेड्डो।



होरसां तियैरारे दिहाड़ेरे बाद यहूदी केरे आरामेरे
दिहाड़े प्रधान याजक ते फरीसी लोक मिलतां
पिलातुसे कां पुजे। ते ज़ोने लग्गे
महाराज असन यादे कि तैनी
धोखे बाजे अपने ज़ींते सांसेइं
ज़ोरू थियूं, “अवं मरनेरे
ट्लेइ दिहाड़ां बाद
फिरी ज़ींतो भोनोईं।”
तैखन तैनेईं गेइतां घोड़े

पुड़ मोहर

लाई,

ते कब्ररारे
पेरहे लेइ
पेरहेदार
रख्खे।





आरामेरे दिहाड़ेरे बाद हफतेरे पेइले दिहाड़े
ट्लेकड़ोंते-ट्लेकड़ोंते मगदलीन ड्लंव्वेरी
मरियम ते होरि मरियम ज़ैड़ी यीशुएरी
लाश कब्री मां रखवोरी थी, हेरने
एई। ते हेरा अक बड़ो भुंज़ल
अव, किजोकि परमेशेरो
अक स्वर्गदूत स्वर्गेरां ओरो
थियो, ते तैस कब्री अगरां
घोड़ उन्ढो बिछोड़तां
तैस पुड़
बिश्शी

जेव। पेरहेदार डेरतां
थर-थर कम्बने लग्गे ते
ज़ेरे मुड़दे भोए।



स्वर्गदूते कुआन्शन सेइं ज़ोवं, “डरा नन्ना, अवं
ज़ानताईं कि तुस यीशुए तोपने लोरिथ,
ज़ै क्रूसे पुड़ चाढोरोए। तै इड़ी नईं
बल्के ज़ेन्चरे तैनी ज़ोरू थियूं,
तै ज़ींतो भोरोए, एज्जा तै ठार
हेरा, ज़ैड़ी प्रभु थियो।”



तैखन तैना कुआन्शां डेरतां भी ते खुशी सेइं भी कब्री
मरां बेइर एई, ते दौवड़ती-दौवड़ती जेई ताके
चेलन पतो देन। तैखन यीशु तैन मैल्लो,
ते तैनी ज़ोवं तुसन शान्ति मैल्ले, ते तैनेई
तैसेरे पाव बंते, ते तैस कां मथ्यो टेको।



तैल्ला पत्ती, यीशु अपने 11 चेलन भी लेइहोव, ज़ैखन तैना रोट्टी खेइ
राओरे थिये। त तैन केरे अविश्वास त कने सखत दिलेरे वजाई सेइं
यीशुए तैना डांटे, किजोकि तैनेईं तैन केरो विश्वास न कियो, ज़ैनेईं यीशु
ज़ींतो भोनेरे पत्ती तै लेवरो थियो। यीशु अपने चेलन सेइं गल्लां करनेरां
पत्ती, परमेशरे तै स्वर्गे जो नीयो। ते यीशु परमेशरेरे देइने
पासे राज़गेद्दी पुड़ बिश्शी जेव।



किजोकि परमेशरे दुनियारे लोकन सेइं
एत्रो प्यार कियो कि तैनी अपनू अक्के मट्ठू
दित्तू, ताके जै कोई तैस पुड़ विश्वास केरे,
तै नाश न भोए, बल्के हमेशारी
ज़िन्दगी हासिल केरे।



रोमियो 3:23

एल्हेरेलेइ कि सेब्भेईं पाप कियो, ते तैस महिमा करां दूर आन ज़ै परमेशर देते।

रोमियो 6:23

किजोकि पापेरी मज़दूरी त मौते, पन परमेशरेरू वरदान इश्शे प्रभु यीशु मसीह मां हमेशारी ज़िन्दगी आए।

इब्रानियों 9:27

ते ज़ेन्त्रे सेइं मैनेरू मरनू ते एक्की बार इन्साफेरू भोनू पक्कुए।



इफिसियों 2:8,9

किजोकि विश्वासेरे ज़िरिये परमेशेरेरे अनुग्रहे सेइं तुसन मुक्ति मैलोरीए, ते तुसेईं अपनो आपे एप्पू नईं बच्चावरो बल्के परमेशेरेरे दाने सेइं तुस बच्चोरेथा। ते भले कम्मन सेइं नईं, एरू न भोए कि कोई घमण्ड केरे।

रोमियो 10:9,10

अगर तू अपने ज़बाना यीशुए, प्रभु ज़ेनतां मन्नस ते अपने दिल सेइं विश्वास केरस, कि परमेशेरे तै मुडदन मरां ज़ींतो कियो, त तीं परमेशर पक्की मुक्ति देलो। किजोकि इश्शे विश्वासेरे ज़िरिये सेइं अस परमेशेरेरी नज़री मां धर्मी भोतम, ते इश्शे इकरार केरने सेइं मुक्ति मैलोरीए।



यूहन्ना 3:16,17

“किजोकि परमेशरे दुनियारे लोकन सेइं एत्रो प्यार कियो कि तैनी अपनू अक्के मट्ठू दित्तू, ताके जै कोई तैस पुड़ विश्वास केरे, तै नाश न भोए, बल्के हमेशारी ज़िन्दगी हासिल केरे। किजोकि परमेशरे अपनू मट्ठू दुनियाई मां एल्हेरेलेइ नईं भेजोरू कि तै दुनियारे लोकन (तैन केरे पापां केरि) सज़ा दे, बल्के एल्हेरेलेइ कि दुनियारे लोक तैसेरे ज़िरिये सेइं (पापां केरि सज़ाई करां) मुक्ति हासिल केरन।

1 यूहन्ना 5:11-13

ते तै गवाही ईए, कि परमेशरे असन हमेशारी ज़िन्दगी दित्ती, ते ई ज़िन्दगी तैसेरे मट्टे मांए। ज़ेसेरो रिश्तो मट्टे सेइं आए तैस कां ज़िन्दगीए, ते ज़ेसेरो रिश्तो परमेशरेरे मट्टे सेइं नईं, तैस कां हमेशारी ज़िन्दगी भी नईं। मीं तुसन, जै परमेशरेरे मट्टेरे नंवे पुड़ विश्वास केरतो भोए, एल्हेरेलेइ लिखताई, कि तुसन पतो लग्गे, कि हमेशारी ज़िन्दगी तुश्शीए।



मत्ती 26-28; लूका 22-24; यूहन्ना 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Bhadrawahi NT (bhd) (भड्लार्ई बाइबिल), 2020
by The Love Fellowship is licensed under a Creative
Commons Attribution-ShareAlike 4.0 International License.

<https://www.bible.com/en-GB/bible/2767/MAT.1.BHD-NT>

©2026 Bible for Children, Inc.

www.M1914.org

www.bibleforchildren.org

